



Republika e Kosovës
Republika Kosovo - Republic of Kosovo
Kuvendi - Skupština - Assembly

Legjislatura IV
Sesioni vjeshtor

Mbledhja plenare e Kuvendit
P- 79
Prishtinë, më 3, 4 dhe 11 tetor 2012

PROCESVERBAL

**I MBLEDHJES PLENARE TË KUVENDIT TË REPUBLIKËS SË KOSOVËS, E
MBAJTUR MË 3, 4 dhe 11 TETOR 2012**

Mbledhjen e kryesoi **Jakup KRASNIQI**, kryetar i Kuvendit, ndërsa i ndihmoi **Xhavit HALITI**, nënkryetar i Kuvendit.

Kryetari konstatoi se në sallë janë të pranishëm 73 dhe i deklaroi të hapura punimet e mbledhjes plenare.

Ai procedoi me rendin e ditës, të përgatitur nga Kryesia e Kuvendit, në marrëveshje me kryetarët e grupeve parlamentare.

**1. Debat parlamentar, sipas kërkesës së deputetit Visar Ymeri, lidhur me
procesin e privatizimit në Kosovë**

Kryetari i njoftoi deputetët se deputeti Visar Ymeri dhe grupi i deputetëve nënshkruan ka parashtruar kërkesë për debat parlamentar lidhur me procesin e privatizimit në Kosovë.

Kryesia e Kuvendit, në mbledhjen e mbajtur më 21 gusht 2012, ka kërkuar nga Qeveria e Kosovës që ta përgatisë një informatë për procesin e privatizimit në Kosovë.

Ndërkohë, Komisioni për të Drejtat e Njeriut, Barazi Gjinore, Persona të Pagjetur dhe Peticione e ka shqyrtuar peticionin e parashtruar nga Bashkimi i Sindikatave të Pavarura të Kosovës dhe Kuvendit i ka rekomanduar që lidhur me këtë çështje të zhvillohet debat.

Kryetari e ftoi parashtruesin e kërkesës për debat që para deputetëve të Kuvendit ta paraqesë dhe arsyetojë mocionin.

Deputeti Visar Ymer, në cilësinë e propozuesit të mocionit, tha se e kanë parashtruar këtë kërkesë për ta diskutuar procesin e privatizimit në përgjithësi në Kosovë për dy arsye thelbësore.

Një, që ky proces është një prej proceseve që kanë ndodhur pas luftës, e që është më i diskutueshmi dhe i cili ngre dyshimet më të mëdha sa u përket zhvillimeve në të dhe, në anën tjetër, për shkak se jemi vazhdimisht duke diskutuar, jo vetëm pasojat që i ka sjellë procesi i privatizimit të ndërmarrjeve shoqërore, po veçanërisht pasojat e dëmshme për ekonominë e Kosovës.

Procesi i privatizimit në Kosovë kishte filluar në vitin 2001, me një arsyetim të këndshëm për veshin tonë, pra privatizimi - shitja na shitej atëherë si mundësia e vetme e zhvillimit ekonomik.

Sot po e shohim qartë që shitja paska qenë qëllim, e premtimi për zhvillimin ekonomik vetëm mjet për ta arsyetuar shitjen.

Në vitin 1999, e pastaj në vitin 2000 dhe deri në vitin 2001, kur fillon privatizimi, të gjitha ndërmarrjet në Kosovë kanë qenë në pronësi shoqërore dhe publike.

Një ekonomi me potencial prodhimi dhe shitjeje të prodhimeve u shndërrua sakaq në ekonomi që shet vetëm prona shoqërore, nëpërmjet spin off-eve të organizuara nga Agjencia Kosovare e Mirëbesimit.

Privatizimi është vendim politik. Ai është një prej mjeteve që shtetet e përdorin në raste dhe kushte të caktuara, kur vlerësohet se një ndërmarrje do t'i shërbente më shumë mirëqenies po që se është e privatizuar. Privatizimi asnjëherë nuk mund të jetë mjeti i vetëm, e aq më pak shënjesë kryesor i strukturës ekonomike, siç ka ndodhur këtu në Kosovë.

Shumica e ndërmarrjeve e kanë ndryshuar destinimin ekonomik si pasojë e privatizimit. Potenciali prodhues që kishte Kosova thuaja se është shkatërruar tërësisht, prapë si pasojë e drejtpërdrejtë e privatizimit.

Kemi raste të shumë fabrikave tjera, të cilat sot nuk janë funksionale fare dhe të cilave u është ndryshuar destinimi. Për shembull, kemi raste të fabrikave, kur fabrikat janë

shndërruar në godina hoteliere, në depo për deponimin e mallit dhe ka edhe të tilla që janë rrënuar tërësisht, duke u shndërruar në sheshe ndërtimi, pra janë ndërtuar banesa aty, në vend të fabrikës ekzistuese. Dhe, e tërë kjo ka rezultuar në një gjendje shumë të rëndë ekonomike për Kosovën, e veçanërisht për punëtorët e Kosovës.

Të gjitha ndërmarrjet e privatizuara e kanë reduktuar numrin e punëtorëve në minimumin e domosdoshëm, duke e rritur kështu eksploatimin, keqpërdorimin dhe shfrytëzimin e tyre.

Në vitin 2001 është krijuar Agjencia Kosovare e Mirëbesimit. Krijimi i kësaj agjencie nga UNMIK-u, e pranuar edhe nga politikanët vendorë, ka qenë një ndër krimet më të mëdha ekonomike që i ka ndodhur Kosovës, për shkak se e tërë prona e Kosovës, prona shoqërore, fabrikat, tokat bujqësore dhe të gjitha kapacitetet tjera prodhuese, agjentët ekonomikë të Kosovës i janë venë në dispozicion një agjencie, e cila ka qenë absolutisht jashtë kontrollit të çfarëdo institucioni vendor.

Në vitin 2008, pra pas shpalljes së pavarësisë së Kosovës, Qeveria e Kosovës thoshte se tash jemi vend sovran dhe do t'i marrim vendimet vetë. Çfarë bëjmë me procesin e privatizimit? Jo vetëm që nuk e hap një proces të hetimit dhe të rishikimit të procesit të privatizimit, por vazhdon me avazin e njëjtë, aty ku e kishte lënë AKM-ja, vazhdon me AKP-në që të privatizojë dhe e nis një proces tjetër privatizimi të pronës publike, që e zhvillon Qeveria e Kosovës.

Dhe, tash jemi në momentin kur po kërcënohet e tërë prona publike që të privatizohet nga kjo Qeveri. Pra, po kërcënohet të privatizohet rrjeti i shpërndarjes së energjisë elektrike, po kërcënohet të privatizohet Posta dhe Telekom i Kosovës.

Natyrisht se të jesh kundër këtij privatizimi dhe të jesh kundër privatizimit të pronës publike nuk nënkupton automatikisht që të jesh kundër sektorit privat dhe Lëvizja “Vetëvendosje” e mbështet sektorin privat dhe mendon që sektori privat është i rëndësishëm dhe i domosdoshëm në zhvillimin e vendit. Por, prona publike është po aq e rëndësishme dhe po aq e shenjtë sa edhe prona private.

Kryetari e ftoi ministrin Besim Beqaj që ta paraqesë qëndrimin e Qeverisë së Kosovës për procesin e privatizimit në Kosovë.

Ministri **Besim Beqaj** tha se e ka njoftuar Kuvendin që për procesin e privatizimit, që ka të bëjë me AKM-në dhe AKP-në, e cila është shndërruar në vitin 2008, duhet ta thërrasin këtë të fundit dhe Kuvendi është organi më i lartë, i cili merret me këtë proces.

Unë mund të flas për politikën qeveritare, të cilat mundësojnë një zhvillim ekonomik, si filozofi ekonomike, si koncept ekonomik dhe normalisht Qeveria e Kosovës është e përkushtuar konform Kushtetutës së Republikës së Kosovës dhe në harmoni me vizionin e vet të qëndrueshëm ekonomik për zhvillimin, për reformë strukturale, për funksionalizim të ekonomisë së tregut, për fuqizim të sektorit privat, për vendosje të normave të larta profesionale dhe institucionale, të cilat janë në funksion të rritjes ekonomike dhe ky zhvillim i qëndrueshëm, të nderuar deputetë, nënkupton në vete, jo

vetëm zhvillimin ekonomik, por edhe kohezionin socio-ekonomik dhe atë të ruajtjes së ambientit. Ky është koncepti i zhvillimit të qëndrueshëm ekonomik.

Qeveria e Kosovës është shumë e përkushtuar për të vazhduar me reformën edhe në sektorin energjetik, edhe në sektorin e telekomunikacionit dhe në sektorë tjerë, të cilët janë pjesë e drejtpërdrejtë e funksionimit të obligimeve qeveritare.

Zhvillimin ekonomik e bën sektori privat. Zhvillimi ekonomik duhet të përkrahet nga shteti me politika të mira, me infrastrukturë dhe me proces të vazhdueshëm të funksionimit të rendit dhe ligjit dhe kjo është detyrë.

Pra, këto procese, të cilat janë në vijim, sepse ende nuk kemi privatizuar asgjë nga asetet publike, jemi në proces të privatizimit, dhe besoj se jemi duke e bërë me transparencën maksimale, me angazhim të plotë të shoqërisë civile, të profesionistëve, të sindikatave dhe me një pjesëmarrje jashtëzakonisht të gjerë.

Sektori privat punëson më shumë se 80% të punonjësve të Republikës së Kosovës dhe është kontribuuesi më i fuqishëm në Buxhetin e Kosovës.

Kosova është shkatërruar ekonomisht nga politika okupuese dhe shkatërruese serbe dhe nga lidhja e ekonomisë së Kosovës në atë kohë me politikën e Serbisë dhe me politikat e gabuara të zhvillimit ekonomik.

Unë jam shumë i bindur se të gjithë ata njerëz, të cilët nuk e përkrahin ekonominë e tregut, të cilët propagandojnë ekonomi të planifikuar dhe të centralizuar, të gjithë ata të cilët fatkeqësisht po e pengojnë ardhjen e investitorëve të huaj, këtë po e bëjnë në dëm të zhvillimit ekonomik dhe në dëm të qytetarëve të vendit.

Dhe, për fund, më lejoni, sepse u përmend këtu edhe mocioni, edhe iniciativa e BSPK-së për petition. Fillimisht, ky petition nuk është i konfirmuar dhe, e dyta, është folur për privatizimin e “Trepçës”. Unë nuk e di kur BSPK-ja ose një institucion tjetër vendor ka folur për privatizimin e “Trepçës”. Dhe, për më shumë, dhe për të qenë injoranca edhe më e madhe, është se BSPK-ja është e ulur në Bordin e AKP-së, e cila është përgjegjëse për “Trepçën”.

Pastaj, kryetari e hapi debatin parlamentar për procesin e privatizimit në Kosovë.

Adem Grabovci, në emër të Grupit Parlamentar të PDK-së, tha se e mirëpresin çdo debat, i cili u kontribuon zhvillimeve pozitive në vend, në veçanti zhvillimit ekonomik.

Privatizimi, si proces nuk ka filluar as nuk do të përfundojë me këtë Qeveri. Ky është proces i vazhdueshëm, i cili determinohet nga ekonomia e lirë e tregut dhe zhvillimet tjera nacionale dhe globale.

Në kapitalizëm çdo gjë varet nga tregu. Ne jemi shumë të vetëdijshëm se pa depërtimin e kapitalit të freskët nga jashtë, pa investitorë seriozë, të cilëve duhet t’u krijohen kushte joshëse dhe kurrësi të frikësohen, ekonomia jonë nuk mund të rimëkëmbet.

Ne kemi pasur probleme të vazhdueshme në rrafshin politik, sa i përket privatizimit.

Bazuar në Kushtetutën e Kosovës për ekonomi të lirë të tregut, bazuar në vendimet e këtij Kuvendi, si dhe bazuar në ligjet për ndërmarrjet publike, procesi i privatizimit është zhvilluar me transparencë dhe në bazë të standardeve më të larta ndërkombëtare. Në këtë proces kanë qenë të përfshirë të gjitha grupet e interesit, përfshirë shoqërinë civile, institucionet vendore, ndërkombëtare, investitorët dhe punëtorët.

Agjencia Kosovare e Privatizimit themelohet si pasardhëse e Agjencisë Kosovare të Mirëbesimit, si një organ i pavarur publik, i cili ushtron funksionet dhe përgjegjësitë në mënyrë plotësisht të pavarur, në bazë të ligjit.

Kuvendi i Kosovës, pas krijimit të këtij mekanizmi, e ka aprovuar strategjinë e energjisë së Republikës së Kosovës për periudhën 2009-2018, pastaj ia ka dhënë dritën jeshile Qeverisë së Kosovës për privatizimin e PTK-së dhe asetet e tjera, që të heqë ndikimin e pushtetit nga pasuria publike.

Grupi Parlamentar i PDK-së beson se të gjitha grupet e interesit, ashtu edhe grupet parlamentare në Kuvend, të cilat e dëshirojnë zhvillimin ekonomik të vendit, duhet ta mbështetnin procesin e privatizimit, në mënyrë që t'u japin kurajë investitorëve të huaj, që kanë synim të investojnë në vendin tonë.

Grupi Parlamentar i PDK-së do ta mbështesë edhe në të ardhmen procesin e privatizimit, të bindur se është në interes të forcimit të shtetit të Kosovës.

Teuta Sahatqija, në emër të Grupit Parlamentar të LDK-së, tha se në parim e përkrahim privatizimin, pasi besojmë se iniciativa private, motivimi dhe dinamika e shndërrojnë një ndërmarrje në ndërmarrje aktive të aftë për t'u përballur më lehtë me vështirësitë dhe më dinamike në përshtatje të kërkesave të kohës. Megjithatë, zhvillimi ekonomik është i qëndrueshëm, nëse resurset shfrytëzohen racionalist dhe nëse nga e gjithë kjo përfiton zhvillimi ekonomik i vendit.

Privatizimi i ndërmarrjeve shoqërore tani mund të konsiderohet si një proces gati i përfunduar.

Nëse i analizojmë rezultatet, të cilat dolën prej privatizimit, i cili ishte dashur të paramendohet si iniciues i zhvillimit ekonomik dhe si krijues i vendeve të punës, në fakt ne jo që kemi më tepër vende të punës, por kemi diku nja 70 000 të papunë.

Ne jemi të vetëdijshëm se sistemi i vjetër i pronësisë dhe menaxhimit është punë e kryer dhe jemi në një fazë të re, por gjithashtu mendojmë se ky proces do të mund të ishte i menduar më mirë dhe të sjellë rezultate më të favorshme dhe të nxisë zhvillimin ekonomik.

Ajo, në emër të GP të LDK-së, propozoi që Kuvendi t'i miratojë këto rekomandime:

1. LDK-ja, si parti e qendrës së djathtë, e përkrah në parim privatizimin si proces.
2. LDK-ja kërkon të rishikohet privatizimi i disa aseteve kryesore publike që i ka Kosova.

3. Privatizimi i PTK-së të sillet në Kuvendin e Kosovës për aprovim së bashku me një strategji lidhur me këtë privatizim, e cila strategji i definon interesat e Republikës së Kosovës në këtë aset publik dhe mënyrën se si do të përdoren mjetet nga privatizimi i kësaj ndërmarrjeje publike.

4. Të rishikohet strategjia energjetike e Republikës së Kosovës nga Qeveria dhe të sillet në Kuvendin e Kosovës për aprovim, e cila duhet t'i definojë interesat e Kosovës në këtë sektor.

5. Të shtyhet privatizimi i Kosovës B, i ndërtimit të Kosovës së Re, dhe privatizimi i Distribucionit deri pas aprovimit të strategjisë energjetike të Republikës së Kosovës nga Kuvendi i Kosovës.

6. Të përgatitet një strategji nacionale nga Qeveria dhe të sillet për aprovim në Kuvendin e Kosovës lidhur me shfrytëzimin e mjeteve të mbledhura nga privatizimi i ndërmarrjeve shoqërore në kuadër të Agjencisë të Privatizimit të Kosovës, si dhe mjetet nga privatizimi i ndërmarrjeve publike.

Donika Kada-Bujupi, në emër të Grupit Parlamentar të AAK-së, tha se i kemi dy ekstreme rreth procesit të privatizimit. Ekstremi i parë është Qeveria, e cila e ka shfrytëzuar privatizimin si mjet për t'u pasuruar vetë, e jo si mjet për ta arritur një qëllim, që në rrethanat e tjera do të ishte mjet për thithjen e kapitalit privat, zhvillimin e biznesit, uljen e papunësisë, futjen e konkurrencës në treg dhe demonopolizimin dhe kemi një qëndrim tjetër ekstrem që kundërshton dhe demonizon privatizimin si koncept.

Aleanca për Ardhmërinë e Kosovës ka qëndrim tjetër që dallon nga këto dy qëndrime. Është kundër të parit, sepse s'ka të bëjë me privatizim, por privatizimi është shfrytëzuar për keqpërdorim, për korrupsion dhe kriminalitet nga Qeveria. Dhe, kundër qëndrimit të dytë, sepse konsiderojmë se potenciali zhvillimor mund të vijë vetëm nga investimet private dhe konkurrenca e lirë, por jo nga paratë e taksapaguesve.

Atë çfarë kemi parë deri më sot në procesin e privatizimit në Kosovë tregon që transformimin e ndërmarrjeve publike në këtë proces, nga fillimi në mbarim, e shfrytëzuan në esencë për keqpërdorim, zhvlerësim të pronës për shkak të pazareve, një shitje të ndërmarrjeve matrapazëve, të cilët nuk i zhvilluan këto, por përkundrazi i rrjepën dhe punëtorët i lanë në rrugë.

E kemi parë një proces, i cili do ta instalojë monopolin, si në rastin e KEK-ut, dhe kjo është krejt në kundërshtim me atë çka ju po promovoni.

Privatizimi degradues në Kosovë duhet të ndalet deri në fuqizimin e shtetit ligjor.

Duhet që të gjendet domosdoshmëria për tregje konkurruese, post-privatizuese dhe në gjetjen e kohës së përshtatshme për privatizim. Ky privatizim, si i tillë, duhet të ndërpritet, sepse në momentin kur po ndodh sot keqmenaxhimi i ndërmarrjeve kosovare, ku ka pasur dorë politika, bën që këto ndërmarrje të mos duken aspak atraktive për investitorët e huaj dhe rrjedhimisht i bën më pak të kushtueshme. Para vazhdimit të çdo privatizimi të ndërmarrjeve duhet të bëhet modifikimi i tyre, pastrimi nga anomalitë, vlerësimi real, caktimi i një pragu minimal, e më pas shitja, pra privatizimi.

Dhe, në fund, po e përmbyll me faktorin njeri. Gjatë këtij procesi, në 99% të rasteve, punëtorët kanë mbetur në rrugë, sepse nuk kemi pasur privatizim të suksesshëm dhe jo rastësisht sot kemi mbi 66 mijë nënshkrime kundër privatizimit.

Myzejene Selmani, në emër të Grupit Parlamentar të KKR-së, tha se janë për privatizimin e ndërmarrjeve shoqërore dhe të ndërmarrjeve publike, proces i cili duhet të jetë transparent, i përgjegjshëm dhe duhet të ketë llogaridhënie edhe për deputetët, edhe për qytetarët.

Shteti i Kosovës është për ekonomi të lirë të tregut dhe për konkurrencë. Esenca e zhvillimit ekonomik të Kosovës është nga investimet private, e jo nga Buxheti i Kosovës, sepse ai është mjaft i varfër.

Çështja esenciale për Kosovën, në fazën në të cilën gjendet, është zbatimi i ligjit dhe zhvillimi ekonomik.

Në rast se nisemi nga sektori më i rëndësishëm, meqë ndoshta duhet të kemi zhvillim sekondar ekonomik, është sektori i energjisë dhe të hartohet strategjia e energjisë.

Ndërkaq, për Kosova B është thënë mjaft mirë se do të dalë prej pakos së Termocentralit Kosova e Re.

Ndërsa çështje tjetër është privatizimi i ndërmarrjeve shoqërore, e mund të themi se privatizimi i tyre ka filluar në kohën e UNMIK-ut, ka filluar me qëllim që të ketë zhvillim ekonomik, mirëpo është vërejtur se procesi diku-diku ka çaluar dhe nuk ka qenë aq i mirë.

Kryetari Jakup Krasniqi, në cilësinë e deputetit, diskutimin e tij e shtroi në formë pyetëse se a i duhet privatizimi Kosovës? Përgjigjja më e shkurtër do të ishte PO. Por, si? Kjo është çështja që kërkon një përgjigje nga ne sot.

Tanimë nga të gjithë pranohet se zhvillimi i qëndrueshëm ekonomik, hapja e vendeve të reja të punës dhe rritja e mirëqenies për qytetarët varet në radhë të parë nga zbatimi i politikave dhe reformave adekuate ekonomike dhe strukturore, të cilat do të siguronin shfrytëzimin optimal e racional të resurseve natyrore të kapaciteteve njerëzore që i ka Kosova.

Privatizimi do të duhej të ishte në shërbim të zhvillimit ekonomik. Kjo deri më sot nuk ka ndodhur. E kjo do të thotë se privatizimi është bërë keq, bile edhe tepër keq.

Ristrukturimi i sektorit të energjisë, zhvillimi i resurseve minerare dhe modernizimi i industrisë së përpunimit mineral ishin kushte dhe parametra të domosdoshëm për t'i joshur investimet private dhe zhvillimin e kapaciteteve të reja prodhuese.

Domosdoshmërisht, për të qenë i suksesshëm procesi i privatizimit do të duhej të përcillej nga: strategjia e zhvillimit ekonomik të Republikës së Kosovës, që nuk e ka; definimi i interesit nacional, që nuk e ka bërë; infrastruktura komplecte ligjore, e përpunuar me kujdes; një reformë qeveritare e përpunuar mirë e me kujdes për tërheqjen e investimeve të jashtme e të brendshme; vendosja e procedurave të drejta, të thjeshta, transparente dhe

të përgjegjshme; hulumtimi i përvojave dhe i modeleve të privatizimit nga vendet e tjera, të cilat do të korrespondojnë me kompleksitetin e sektorëve përkatës dhe kërkesat për transformimin e aseteve të tyre; debati cilësor dhe gjithëpërfshirës, i cili do të kontribuonte në arritjen e një konsensusi bazik ndërmjet aktorëve kyç të ndërlidhur me këtë çështje; një Bord Kombëtar i Privatizimit, i përbërë nga njerëz me integritet të lartë, njerëz që nuk u nënshtrohen sekserëve të gjithëfuqishëm; politika fiskale në shërbim të investimeve dhe të investitorëve, pa përjashtim, por jo politika të korruptueshme fiskale, siç ka ndodhur deri më tani.

Pse pas 17 shkurtit nuk ka pasur asnjë përpjekje serioze për t'i ngrehur kapacitetet qeverisëse e administrative të vendit? Pse nuk ka pasur vullnet për të qeverisur me njerëz që ndiejnë përgjegjësi për të qeverisur mirë e në shërbim të publikut?

Përgjegjësia për këtë kryekëput është e të gjitha kabineteve qeveritare të pasluftës, të cilët kanë përzgjedhur njerëz që ishin e janë pjesë e krimit të organizuar ekonomik.

Ne jemi të obliguar që qytetarëve tanë t'ua kthejmë besimin në institucione, për të cilat kanë sakrifikuar shumë, dhe besimin në përfaqësimin tonë, nëse nuk dëshirojmë të bëhemi vrasës të ardhmërisë e të demokracisë në Kosovë.

Ky popull ka njerëz që meritojnë, që dinë e guxojnë të qeverisin më mirë me këtë vend, që dinë të qeverisin me pasurinë publike, se ky popull e ka krijuar me sakrifica të mëdha këtë pasuri.

Kryetari paraqiti disa nga mangësitë dhe shkeljet që e kanë përcjellë privatizimin e "Ferronikelit".

Shumë privatizime deri më sot, shtoi kryetari, kanë dëshmuar se janë bërë keq, por rasti i hotelit "Grand" tregon se interesimi i krimit të organizuar për Postën, KEK-un dhe "Trepçën" do të jetë shumëfish më i madh dhe mund t'i kalojë kufijtë e Kosovës. Tani ne, Kuvendi, duhet të kërkojmë ndihmë nga Shtetet e Bashkuara të Amerikës dhe nga Bashkimi Evropian që të na ndihmojnë në ndërprerjen e privatizimit, derisa ta forcojmë sundimin e ligjit. Mungesa e ligjeve të mira, ekzistimi i liderëve mbi ligjin, së bashku me krimin e organizuar, janë argumente të fuqishme se privatizimi nuk po bëhet për të mirën e publikut.

Për procesin e privatizimit në Kosovë diskutuan edhe këta deputetë: **Naser Osmani, Halit Krasniqi, Albin Kurti, Xhevdet Neziraj, Sevdije Lama, Berat Buzhala, Haki Demolli, Rexhep Selimi, Teuta Haxhiu, Muhamet Mustafa, Hydajet Hyseni, Afërdita Berisha-Shaqiri, Fatmir Limaj, Glauk Konjufca, Suzan Novobërdaliu, Valbona Dibra, Sali Asllanaj, Ganimete Musliu, Alma Lama, Afrim Kasolli, Idriz Vehapi, Hykmete Bajrami, Daut Haradinaj, Albana Fetoshi, Goran Marinković, Nijazi Idrizi, Liburn Aliu, Ramiz Lladrovci, Albana Gashi, Sala Berisha-Shala, Muhamet Mustafa, Kurtan Kajtazi, si dhe kryeministri Hashim Thaçi dhe ministrat Bedri Hamza dhe Bajram Rexhepi**, diskutimet e të cilëve janë dhënë të plota në transkript.

Në fund, kryetari i Grupit Parlamentar i Lëvizjes "Vetëvendosje", **Visar Ymeri**, i propozoi Kuvendit ta miratojë këtë mocion:

Kuvendi i Republikës së Kosovës merr vendim që procesi i privatizimit të ndërmarrjeve publike të pezullohet për një kohë, derisa të plotësohen kushtet, si vijon:

1. Vendimi për privatizimin e Postës dhe Telekomit të Kosovës të sillet në Kuvendin e Kosovës për aprovim, së bashku me një strategji lidhur me këtë privatizim, e cila i definon qartë interesat e Republikës së Kosovës në këtë aset publik dhe mënyrën se si do të përdoren mjetet nga privatizimi i kësaj ndërmarrjeje publike.
2. Të rishikohet strategjia energjetike e Republikës së Kosovës nga Qeveria, si dhe të sillet në Kuvendin e Republikës së Kosovës për aprovim, strategji kjo e cila duhet t'i definojë interesat e Kosovës në këtë sektor.
3. I gjithë aranzhmani për privatizimin e kompanisë për Distributim dhe Furnizim të energjisë elektrike të rishqyrtohet dhe Qeveria të sjellë për këtë një propozim në Kuvend për miratim, dhe
4. Të përgatitet një strategji nacionale nga Qeveria dhe të sillet për aprovim në Kuvendin e Republikës së Kosovës lidhur me shfrytëzimin e mjeteve të mbledhura nga privatizimi i ndërmarrjeve shoqërore në kuadër të Agjencisë Kosovare të Privatizimit.

Adem Grabovci, në emër të grupet parlamentare të Koalicionit, i propozoi Kuvendit që ta miratojë këtë rezolutë:

1. Në harmoni me vendimet e Qeverisë dhe Kuvendit të Republikës së Kosovës, Qeveria e Republikës së Kosovës të vazhdojë implementimin e procesit të privatizimit konform standardeve dhe normave ndërkombëtare me transparencë.
2. Në përputhje me aktet ligjore në fuqi, Agjencia Kosovare e Privatizimit të vazhdojë krijimin e ndërmarrjeve të reja nëpërmjet privatizimit të aseteve të ndërmarrjeve shoqërore, si dhe fondi i mirëbesimit të ofrohet në shfrytëzim dhe në funksion të zhvillimit ekonomik të vendit.
3. Konform akteve ligjore në fuqi, Kuvendi i Republikës së Kosovës të vazhdojë me monitorimin dhe kërkojmë nga Zyra e Rregullatorit të Energjisë dhe nga Autoriteti Rregullativ të Telekomunikacionit mbikëqyrjen e sektorit përkatës, si dhe monitorimin e aktiviteteve të Agjencisë Kosovare të Privatizimit.

Kryetari kërkoi deklarinimin e shefave të grupeve parlamentare për propozimet e paraqitura më lart.

Pas deklarinimit të shefave të grupeve parlamentare, kryetari tha se e kemi një rezolutë dhe një mocion, që na kanë ardhur në fund të seancës.

Kryetari i sqaroi procedurat parlamentare se dy dokumentet e lartshënuara nuk janë parashtruar në përputhje me Rregulloren e Kuvendit. Ai kërkoi nga grupet parlamentare që t'i harmonizojnë qëndrimet rreth tekstit përfundimtar, para se ai të hidhet për votim.

Kryetari e deklaroi të mbyllur mbledhjen e sotme, për t'i vazhduar punimet ditën e nesërme.

Vazhdimi i mbledhjes plenare, më 4 tetor 2012

Kryetari i hapi punimet e mbledhjes plenare të Kuvendit sipas rendit të ditës, të përgatitur nga Kryesia e Kuvendit, në marrëveshje me kryetarët e grupeve parlamentare.

Në fillim të mbledhjes, për fjalë u paraqit kryetari i GP të PDK-së.

Adem Grabovci tha se në fillim të mbledhjes duhet të votohen mocioni dhe rezoluta për debatin e djeshëm. Në të kundërtën, ai kërkoi nga kryetari që të vendosë seanca.

Lidhur me procedimin e kësaj pike diskutuan edhe këta deputetë: Ismet Beqiri, Donika Kada Bujupi, Myzejene Selmani, Goran Marinković, Mufera Sinik, Burim Ramadani dhe Sabri Hamiti, diskutimet e të cilëve janë dhënë të plota në transkript.

Adem Grabovci, në emër të GP të PDK-së, kërkoi pauzë prej 10 minutash për konsultimin e grupeve parlamentare lidhur me procedimin e kësaj pike.

Kryetari dha një pauzë prej 15 minutash.

Në mungesë të kuorumit, kryetari e shtyu vazhdimin e kësaj pike për mbledhjen e radhës.

Vazhdim i mbledhjes plenare, më 11 tetor 2012

Kryetari i hapi punimet e mbledhjes plenare të Kuvendit sipas rendit të ditës, të përgatitur nga Kryesia e Kuvendit, në marrëveshje me kryetarët e grupeve parlamentare.

Kryetari konstatoi se në sallë janë të pranishëm 99 deputetë dhe procedoi me pikën e rendit të ditës

Procedimi i mocionit për procesin e privatizimit në Kosovë, i propozuar nga grupet parlamentare të Lidhjes Demokratike të Kosovës, të “Vetëvendosjes” dhe AAK-së, dhe i rezolutës për procesin e privatizimit në Kosovë, i propozuar nga Grupi Parlamentar i Partisë Demokratike të Kosovës

Kryetari tha se diskutimet për këtë pikë të rendit të ditës kanë përfunduar në mbledhjen plenare më 3 tetor 2012.

Në pajtim me nenin 52, pika 2 e Rregullores së Kuvendit, mocioni për procesin e privatizimit, i propozuar nga grupet parlamentare LDK, “Vetëvendosje” dhe AAK, si dhe rezoluta për procesin e privatizimit, e propozuar nga Grupi Parlamentar i Partisë Demokratike të Kosovës, u janë shpërndarë deputetëve më 4 tetor 2012.

Meqë këto dy dokumente janë pranuar për procedim, atëherë në pajtim me nenin 58, pika 4, të njëjtat duhet t’i hedhim në votim.

Visar Ymeri, në emër të GP të Lëvizjes “Vetëvendosje”, kërkoi që për këtë pikë të procedohet vetëm mocioni i paraqitur me katër pika, në ditën e debatit për procesin e privatizimit në Kosovë.

Adem Grabovci, në emër të grupeve parlamentare të Koalicionit qeverisës, kërkoi që të procedohet për votim edhe rezoluta e paraqitur prej tyre, me tri pika, për procesin e privatizimit në Kosovë.

Lidhur me procedimin e propozimeve të lartshënuara diskutuan: Visar Ymeri, Adem Grabovci, Hydajet Hyseni, zëvendëskryeministri Hajredin Kuçi, Glauk Konjufca dhe Agim Kuleta, diskutimet e të cilëve janë dhënë të plota në transkript.

Pas këtyre diskutimeve, kryetari e hodhi në votim mocionin e parashtruar nga Grupi Parlamentar i Lëvizjes “Vetëvendosje”.

Rezultati i votimit ishte, si vijon:

Për -----45,
Kundër -----53,
Abstenime -----3.

Kryetari konstatoi se Kuvendi, me shumicë votash, nuk e miratoi mocionin e Grupit Parlamentar të Lëvizjes “Vetëvendosje” për procesin e privatizimit në Kosovë.

Kryetari i deklaroi të mbyllura punimet e mbledhjes plenare në orën 10:50 minuta.

Kryetari i Kuvendit

Jakup KRASNIQI

Përgatiti: Drejtoria për Çështje Plenare dhe Procedurale